


BIBLIOTEKA


Zakł. Nar. im. Ossolińskich

XVII

2051









SIMONIS STAROVOLSCI  
EQVES POLONVS.

*Venetus 1628*

*Ockowski P. 163-*

**16.354**



XVII — 2051 — II



VRBANO

VIII.

Pontifici Optimo Maximo

SIMON STAROVOLSCIVS

*utramque Felicitatem.*



Quitem Polonum ad  
pedes tuos PATER  
BEATISSIME Equi-  
tum infimus sisto,

sed in charta, & pennatantum  
depinctum: cum penitiùs in-  
spexeris; in equo, armatum, &

A 2 pennis

pennis cristatum Achillis Homerici more . Generosiores astitamen eo, quòd non ad evertendos vicinos armatus, nec ad turbendam cæterorum quietem, fastu Græcanico inflatus progrediatur ; sed ad domandum barbarorum ferociam, ad defendendum patriam suam, ad asserendum sanctissimam nostram Religionem. Cuius, cum Tu caput sis supremum, & omnium in Ecclesia Christi, aut pro illa militantium Gubernator : meum quoque bellatorem, ad Te educere volui : imò tuum, tibi & non alij sistere debui . Meum, lucubratione tantum ;  
tuum,




tuum, possessione totali; quia  
& ego tuus, & ille talis, pro te  
capite sancto, ac gloria Christi,  
paratus est, caput suum mille  
periculis exponere. Ergo ad pe-  
des Tuos, cum bono affectu ac-  
cedentem, & debita cum reue-  
rentia prouolutum, paterno af-  
fectu excipies. Et quamuis nul-  
lo religionis Sacramēto adstri-  
ctum, non irreligiosum attā-  
men, & effectum, quæ sentit, ad-  
probantem, inter Religioso-  
rum Equitum Ordines, haud  
posteriorem censebis: atq; cum  
capitalissimis Ecclesiæ Roma-  
næ hostibus, Turca, Valacho,  
Moscho, Scythia & Sueco, bella

Domini assiduè præliantem ,  
beabis Tua Sancta BENEDI-  
CTIONE, his difficilimis tem-  
poribus Patriæ nostræ; atque  
me vnà, qui Tuum nomen ve-  
lut tutelare numen hîc statuo,  
quod omnes venerentur . O  
vtinam omnes , vel hostes, vel  
aduersarij tui! atque vtinam Tu  
nobis & Orbi vniuerso diutif-  
simè præsis.





# LECTORI.



*Vi vel curiositatis, vel prudentiæ acquirendæ causa, diuersas regiones peragrant, non est, Candide Lector, quod in Sarmatia nostra videant præstantius, præter conuentum ordinum pro Comitij Regni, et Exercitum, in campum eductum: nam utrobique Equitum Polonorum frequentiam, splendore, facultates, elegantias, morumq; aut humorum compositionem, vno quasi obtutu pernoscent. Cetera populis reliquis communia, minùs fortè aduenis illis admirationis parient. Et*

*Duo digna  
visu in Po-  
lonia, Co-  
mitia, &  
exercitus.*

Comitia di  
uersis tem  
poribus, &  
diuersis in  
locis.

Exercitus  
semper, &  
in Podolia  
communif-  
sime.

Comitia quidem, non semper statis temporibus, aut loco, celebrari solent, sed pro Regis libitu (qui solus ea indicere ius habet; aut Interregno occurrente, Primas Regni, Archiepiscopus Gnesnensis) ac necessitatis exigentia. De more tamen adprobato, Varsouia, in meditullio Regni, et quolibet biennio fieri debent. Exercitus verò (quia cum diuersis, et assiduò, bella gerimus) in diuersis locis et sub tentorijs panè semper habemus, etiam cum bellum non habemus. Solent enim frequentius et inopinatò, barbari in Podoliam, aut Rusiæ Prouincias incurrere, et dàna gravissima popularibus inferre. idcirco ad reprimendos impetus eorum, et iuuentutis nostræ exercendæ causa, solemus perpetuum in excu-  
bys



bijs militem habere. Non enim po-  
 test Resp. vlla longo tempore bonis  
 omnibus et felicitate florere, nisi va-  
 lidis armis et praesidijs, fortissimisq;  
 legionibus septa: quibus, tum perdi-  
 torum civium audaciam temerita-  
 temq; frenet, tum externam hostium  
 vim iniuriamq; prohibeat. Atque  
 ob eam rem, praeter duos exercituum  
 supremos Generales, alterũ Poloniae,  
 Mag. Duc. Litvaniae alterum, duos  
 insuper Campeſtres Duces, hoc est,  
 vicarios priorum, cum honore creare  
 consuevimus; ut si diuersis in locis  
 simul bellum gerere contingat, singu-  
 li singulis exercitibus praesint: quod si  
 et notantũ in loco periculum occur-  
 rat, alter ex supremis illis Generali-  
 bus, à suo Locotenente adiutus molẽ  
 rerum sustineat; qui si minus diffi-  
 cultatis

Exercitũ  
 autem duo  
 Duces Ge-  
 nerales, &  
 duo Cam-  
 pestres sũt.

cultatis videbit, præficiens inniorem castris, seipsū ad maiora atque difficiliora reseruabit. Quapropter si quis Equitem nostrum, quem hic describimus, non adeundo exercitus in campis, nec expectando Comitia Regni, protinūs ubi venerit in Poloniā, exoptabit videre; repperiet eum in pagis passim, quia in villis non in urbibus habitamus. Ceterum maiorē frequentiam, in Aula Regis offendet, aut Lublini, Petriconiae, seu Vlnæ, in quibus locis Tribunalia, seu Parlamenta nostra per aguntur. Et hoc ipsū erat, quod te Lector Nobilissime præmonere volui, priusquā ad Equitis nostri cognitionem accesseris, simulq; scire, omniū Regni Poloniæ Prouinciariū Nobilitatē, æquali iure gaudere, et vniversali vocabulo Equites vocitari, ac re ipsa esse. Vale

Aula quo-  
que Regia  
digna visu,  
& Parla-  
menta Po-  
lonorum.

# SIMONIS STAROVOLSCI

Eques Polonus

*Seu de praestantia Nobilitatis Polona,  
prærogativis, libertate, &  
modo ac ratione militiae,  
brevis connotatio.*

## CAPVT PRIMVM.

*De excellentia, & dignitate Equitis Poloni.*



Quitem, veteri Romano-  
rum vocabulo & vsu, ab  
equo, & equitatione di-  
ctum, nemo est qui non  
sciat; potiolem verò  
pedite, quia ferocior, & velocior in  
bello: & digniorem, quia ex patricijs  
tantum, & præcipua nobilitate. Nec  
plebeio

*Eques quid  
sit, & un-  
de dictus.*

plebeio licebat publicum equum habere, nisi assurgenti ex vulgi fecibus per virtutem. Hoc in primis Romanę potentię incunabulis. namque postea variè immutatum, & turbatum fuit. In Polonia verò nostra, vt à prima origine, ita in hodiernum vsque, in equite omne robur belli, & dignitas honestatis; qui nota probitatis, discriminati à plebe, tanto generosiores spiritus gerunt, quanto plebeijs animis, & humi serpentibus tantùm, sunt superiores. Nec permittitur tractatio armorum vulgo, nisi in quantum ad famulatum, aut seruitia spectant, vel ex eis dilectus fiunt. Equites autem ipsi, quia se superiorem virtute alium neminem vident, neminem quoque ideò maioribus pręrogatiuis inter se superbire permittunt: sed vt probitate pares sunt, ita & honore omnes æquales esse volunt. Et quamuis plurimi sunt, qui vel ex veteri Principum prosapia origi-

*In Polonia  
soli Equites  
arma tra-  
hebant.*

*Et inter se  
omnes sunt  
pares.*



originem trahunt, vel proprijs virtutibus, apud externos Reges, nouos honores conquisitos habent, hoc ipso nihilominus domi, nō sunt altiores alijs, aut meliores; sed Illustriores tantū, præclarè factis, & augustiores, titulis promeritis, quos in ædibus, vel insignibus armorum suorum, præscribere solent: Neque Dux aliquis, Marchio, Comesue vllus, Equite quouis pauperrimo, dicitur nobilior, aut libertate maior: verum ditior tantū, splendidior, & clarior. Et istud ipsum intelligendum est, de omnibus nobilibus, omnium Regni Poloniae Prouinciarum, bello, vel pactis acquisitarum: quæ, cum omnes in plano sitæ sint, & equorum copiam maximam habeant, vel ipsa natura, ciues suos equites faciunt. Hosq; tales, æqualiter natos, & æqualiter institutos, eo reliquis paribus præstantiores, quo meliores sunt probitate, quo illustriores libertate, quo

*Totamq;  
Poloniam  
equorū co-  
pia habent  
refertam.*



14 *Simonis Starouolski*  
quo fortiores in fago, & quo in toga,  
paternæ claritudini proximiores.

## C A P V T II.

### *De immunitatibus, & libertate Equit. Pol.*

Pins II.  
Hist. sui  
temp. c.  
39.

*Libertas  
Polonorum  
maior alijs  
quibuscumque  
populis: &  
in quo con-  
sistit.*

**L**ibertatem cum quisque sapiens  
exoptat, tum omnes nobili loco  
& genere nati, adeò, vt de Parthis le-  
gamus, eos diem illum solennem ha-  
buisse, quo genti libertas orta, excusso  
iugo Persarum, Duce Arsace. Magni-  
tudo enim, & celsitas animi, in amore  
libertatis, & honoris maximè specta-  
tur, qua populi Martiales præditi, nul-  
lo modo iugū seruitutis ferre possunt:  
prout & Equites Poloni, præ alijs sub  
sole libertate gaudentes, nihil non fa-  
ciunt, nihil non conantur, pro eius cō-  
seruatione. Nec Regem insuper habe-  
re velunt, nisi ad libitum electum: nec  
legem

legem ab illo, nisi sancitam à seipsis:  
nec posteros eius hæredes sceptri, nisi  
inquantum ipsis placuerint. In sum-  
ma, & regni habenas, & iurium  
moderationem, & bellorum indi-  
cationes, & impositiones tributorum,  
& pecuniæ cudendæ facultatem pe-  
nes se ipsos retinent, penes Regem  
solùm Maiestatem solam, & distribu-  
tionem honorum. Non secus tamen  
pœnarum, nam has ille plebeijs tan-  
tùm, ob commissa scelera, indicare po-  
test, nobilibus non potest etiam læsa  
Maiestate sua: nisi in publico Regni  
Conuentu, & præuijs sententijs Sena-  
tus, Reque pub. tota consentiente, quã  
repræsentant collecti ex omnibus Pro-  
uincijs Senatores, & Legati nobilita-  
tis. Vnde prima nobis libertatis cau-  
tio, & legis vox *Neminem captiuabimus  
nisi iure victum*. In recentia verò cri-  
mina, per Prouincias, animaduertunt  
locorum Toparchæ: Ad latus autem  
Regis

*Nobiles Po-  
loni non in-  
carceratur  
ante senten-  
tiam Iudi-  
cis, nisi in  
Notorijs.*

Regis patrata, Supremus Regni, aut Magni Ducat. Lituanię Marschalcus: Sicut et in castris, supremus Generalis: aut eorum Locotenētes: à quibus pro-uocare nefas. Sic igitur muniti, & à Regis potentia liberi, & excepti, nihil ei debemus, nisi venerationem vt patri, nihil patrię ipsi aut eius fisco, nisi amorem vt matri: cuius charitate qui non excitatur, aut suauitate non capitur, hunc stupidum, atque adeò inertem stipiti simillimum iudicamus.

*Nobiles Po-  
loni patrię  
quid de-  
beant.*

Et quantum ad amorem Patrię, tenemur, ( in persona quisque sua ) sine ullis stipendijs, ad bellum defensuum, Rege etiam ipso præeunte, cum graue periculum imminet. Cum minus: stipēdia volentibus tribuimus, ex tributis plebi vrbicę, & agricolis nostris, impositis: ipsi ab omni vectigalium, seu datiorum genere immunes, sed vt quisque diues est, aut gloria ducitur, militum manum in Reipub. defensionem



nem offert. Idem, cum offendere aliquem vicinum populum libet: sed approbante nobilitate, namq; Rex ipse, neminem bello lædere ius habet. Imò ne quid tale contra confæderatos Reipub. aut ciues ipsos moliatur, habet semper ex Senatu, etiam post Comitium dimissum, numerum certum assistentem, qui & libertatis custodes, & negotiorum Consiliarij, & Regiæ Maiestatis auctores sunt. Mutanturq; sæpius, alijs succedentibus, sed auctoritate immutabili: sicut & Officiales maiores, scilicet, Cancellarij, Secretarij, Marschalci, aut vices eorum gerentes.

Quantum verò ad venerationem Principis, nihil, inquam, ab ordine Equestri debetur maiestati illius (excepta prouentuum assignatione, quæ iam ordinaria est) præter *fidelitatem*, *et reuerentiam*, nec exigitur vicissim, nisi idem: hoc est, *recta* & ad præscriptum *gubernatio*, atque in omnes pari-

*Quid debeant Regi suo.*

B

ter,

ter, *paternus amor*. Sic enim spontè assumptum in Dominum, omni honore prosequi, æquitas ipsa suadet: & ne verbo quidem maiestatem indutum proscindere, quia Dei solius locum tenet, permittit iustitia. Sed in omnibus publicis scripturis nomen ipsius, tanquam terreni numinis, præfigendum, publicoq; eri imprimendum, iubet ratio, adfirmat communis populorum omnium usus. Vicissim ille, tanto beneficio accepto, subditorum animos, gratitudinis quibusdam signis ad se alliciendo, paternum quodammodo affectum eis monstrare debet, atque vires animi sui eo referre, ut omnes Reipub. partes, inter se beneuolentia constrictæ, pro eius dignitate, pro salute publica, in vnam voluntatem conspirent. Hocq; proprium Regum nostrorum munus est, sicut ab omnibus accipiunt beneuolentiam, ita omnium cōsulere rebus, præsidere in iudicijs, excludere

cludere maleficia, obferuare magistratus, corrigere inutiles, denique proſpicere, quid verè honeſtum, quid verè magnificum, quid verè glorioſum ſit.

Sub talibus igitur & tam glorioſis Principibus, equites ipſi Poloniae noſtræ, ſunt velut principes alibi, aut reguli minores: nam & ſimilem libertatem faciendi cum ſuis poſſeſſionibus, quod placet, habēt, & in colonos ſuos atque oppidanos, ius abſolutiſſimum tenent, non modò imponendi ſeruitia aut exactiones, ſed etiam vitæ & necis. Similiter, in faciendis pro libitu munitiõibus, in extruendis arcibus, conſtruendis ciuitatibus, faciendis tormentis bellicis, alendis ſtipatoribus circa ſe, & militum turmis. Quemadmodum & in parandis veſtibus, conuiujs, poſſeſſionibus, alijs ſue omnibus priuatis & publicis actionibus peragendis. Quiſque ſuo arbitratu viuunt, nec regulam aliam viuendi habet, præter virtutis,

*Regibus in  
libertate  
pares, &  
ſubditorũ  
ſuorum vi-  
tæ ſupremi  
arbitiri.*

& honestatis, quæ sola ornatam omnem vitam reddit.

### C A P V T III.

#### *De moribus Equitum Polonorum, & habitandi ratione.*

**Q**uia boni mores, bonam famam conciliare solent, ea propter monstrare libuit, quomodo his quoque excellant, Equites Poloni, cum tritissimum omnes politiores populi habeant, illos suauiores in conuersando censer, qui virtutibus sunt magis ornati: & mores ipsos comptiores illos dici, qui virtuti viciniore. Et cum quisque probus & bonus, non alijs artibus ad nobilitatem peruenire soleat, quam iustitia, temperantia, prudentia, & fortitudine, alijsque virtutibus præclarissimis, humanitate, videlicet, humilitate, magnificentia, liberalitate, ac pietate: ex quibus, tantus vbique honestatis splendor re-

*Qui mores  
optimi.*



relucet, vt se etiam imperitorum oculis mentique ingerat, & vel à sectatoribus vitiorum, prauisue hominibus laudem suam habeat. Nostri Poloni his virtutibus ea propter innutriti, non solum Barbaris gētibus, quibus cum bella perpetua gerunt, sunt admirabiles, & formidolosi, verum enim uerò clarissimis quibusuis, in familiaritate tolerabiles, & in amicitijs iungendis haud aspersionandi. Submissa namque, & modesta de se opinione suum cuique honorem volentes tribuunt, nec sese preferunt doctiorib. populis, nec scriptis vulgatis mores ceterorum proscindunt, aut suos, licet interdū meliores, iactant: sed fecisse contenti, alijs arbitranda committunt. Sua vero in tantum negligunt vt vix pro patria præclare gestorum seriem perscriptam habeant aut Historiam ritè contextam, idq; non nisi deriuatā ex scriptoribus externis, cui solus Cromerus nunc primū lu-

*Polonorum  
mores placidi.*

*Quia modesti.*

*Non parci  
tamen aut  
sordidi.*

cē dedit, publicis munimentis reuisis. Humanitatem verò nostratium, non est vt in præsens prædicem, cum eam sæpiùs in Poloniam venientes sint experti penè Europæi omnes, & experiūtur quotidie, domibus nobilium velut communi diuersorio vtentes: quod nō turpis lucri, aut iactationis vanæ facere consueuimus, sed liberalitatis innatæ, & patrij moris causa: quo etiam munifici esse solemus in homines virtute conspicuos, aliquando amicitiam illorum ambientes, quamuis sint incogniti nobis, sed tantum cogniti fama bona. Temperantiæ, atque iustitiæ argumentum esto, quod limitibus patrijs contenti, non appetimus aliena, licet benè potuissemus prolatare pomaria nostra: vnde nec bella inferimus vicinis, nec in remotiores machinationes struimus, sed tum demum propugnamus, cum iniuria aliqua læsi fuerimus. Quod totum procedit à modestia quo-

*Sed inter  
limites Iu-  
stitiæ posi-  
ti.*

que

quæ priuatorum, & fide inuiolabili in  
promissionibus, quam cādore ingenuo  
conseruare assueuimus, neq; fas enim  
putamus contractum dissoluere, *verbo  
nobile stipulatum*. Ita maiores nostri,  
ita nos, qui antiquare in probitare vo-  
lumus, sicut succedere in possessioni-  
bus. Fortitudinis demum hoc vnicum  
signum ponamus, quod potius seipso  
vincere, quam hostes contendamus,  
nullam sæuitiam exercendo in subdi-  
tos nostros, absoluti eorum domini, &  
moderatores, quamuis nulla in crude-  
les pœna vel à Rege, vel à lege statuta  
reperiatur, sed sola honestate coerciti,  
quæ morum actionumque nostrarum  
regula est. Et tamen frequentius legi-  
mus, etiam politiores gentes, in tali li-  
bertate aberrauisse, & in subditos po-  
tentia abufos fuisse, seu impotentia  
sæuiisse. Hæc priuatim. Publicè au-  
tem Sarmaticæ fortitudinis hoc spe-  
cimen fiat, quod in faucibus tot ho-

*Maximè si  
aei & can-  
doris splen-  
dore illu-  
stres.*

*In subdi-  
tos benigni  
& clemen-  
tes.*

*In hostes  
animosi li-  
cet vndiq.  
cincti.*

stium positi, & Barbarorum assiduīs  
 populationibus expositi, *Turcharum*  
*videlicet, Scytharum, Moldauorum,*  
*Valachorum, Moscouitarum, Suecorum,*  
*Transylvanorum, Germanicq; Imperij*  
*nonnullorum Principum Hæreticorum*  
*potentiæ: absque vllis munitionibus, &*  
*propugnaculis, hucusque resistamus,*  
*Spartano more, proprijs pectoribus.*  
 Nec iugum alterius (cum Deo bono  
 dicam) hucusque persensimus, aut po-  
 puli, aut Regis alicuius, sed liberi, sed  
 victores semper, ex quo frigidaē Sarma-  
 tiæ campos intrauimus. Credo, non ob  
 aliam virtutem, quam ob cultum syn-  
 ceræ Religionis. nam quid hæc huma-  
 na sunt, nisi iactationes, & fluctus? in  
 quibus nihil firmum sit, nisi ad ancho-  
 ram ea alliges verè Pietatis. Quæ licet  
 priuatim iam, patrum nostrum memo-  
 ria, vacillare cæperat (*in rebus enim hu-*  
*manis, nihil tam faustè feliciterq; agitur*  
*quod non error aliquis interpellet*) publi-  
 cè

*Firmi Re-*  
*ligionis ba-*  
*si inuiten-*  
*tes.*

*Lucianus*  
*de non te-*  
*mere cre-*  
*dendo ca-*  
*lum.*



cè nihilominus per totam Poloniam  
inconcussa stetit, & Rege protegente,  
& sacrorum Missis adoperantibus.

Cæterum quia agrum, & in eo cultū  
meliozem Vrbe dixere veteres sapien-  
tes, tum ad virtutem, tum ad mores, tū  
demum ad militiam & exercitia hone-  
statis, idcò Equites nostri in villis, Ca-  
stellisq; suis, non in ciuitatibus habi-  
tant: & spernunt quodammodo Urbem  
cum illum carcerem, qui altas mentes,  
haud dissimiliter, quam cauea genero-  
sas feras, domat & frangit. Iam autem  
*spernit natura sua includi, cœlestis ille  
ignis,* inquit Belgicæ decus, & aerem  
*amat, ac campos.* Et Polonus à campo di-  
ctus est, qui Pole in Vulgari vocatur;  
Vnde in campis non in Urbibus mane-  
re debet, ut Polonus uerè fiat. Et rectè  
fanè, prudètes enim legislatores olim,  
& qui semina iecere boni status, ciues  
suos plurimum ab Vrbe & conuenti-  
bus abductos, habere voluerūt in agris  
quos

*Habitant  
in agris, &  
cōmodius  
quam in  
urbibus.*

Lipsius  
ep. 8. Cœr.  
I.

quos ad probitatem, modestiã, robur, gymnasium censuere & palestrã. Alias enim, vt flumina per se dulcia, cùm in mare venerint, salescunt: sic homines haud mali, ex agris in Urbem redacti, tactu inquinantur & mixtione: Vnde Hippolytus apud Senecam.

*Non alia magis est libera et vitio carẽs  
Ritusq; melius vita quæ priscos colat,  
Quã quæ relictis menibus cãpos amat.  
Non illũ auaræ mentis inflãmat furor,  
Nõ aura populi, et vulgus infidũ bonis,  
Non pestilens inuidia, nõ fragilis fauor,  
Nõ ille regno scruiat, aut regno imminet,  
Spei metusq; liber.*

### C A P V T IIII.

#### *De exercitijs Iuuentutis Polonæ.*

*Ciuis apud  
Romanos  
diuisio.*

**R**omulus olim æterni auctor Imperij, cùm in duas classes ciuem diuississet, Seruos videlicet ac Liberos: istis duo tantùm studia militiæ, & agri dedit:

dedit: illis artes reliquas, quæ ad Mercurium, & ad Lucrum. Eius institutū, velut perfectissimam Idæam nostri Sarmatæ secuti, omnem aliam turbam quæ in Urbibus, ad mercaturam & artificia, colonos verò qui in pagis illorum, ad agrorum culturam astrinxerunt, se autem solos, ad armorum tractationem, aut eorum, quæ æternitatem spirarent. Et quia hæc ipsa, veteri prouerbio, Marte, & Arte paratur, ea propter in iuuenili adhuc ætate, his potissimum duobus litant, hoc est, pueri, bonas artes tractant, viri, earum vsum, & arma.

Et quo ad disciplinas. habemus præter scholas priuatas, quas vulgo Parochiales dicimus, in pagis nobilium ferè singulorum aut plurium, etiam triginta, & amplius Patrum Societatis IESV collegia, sparsa per prouincias Regni, in quibus inuentus eruditur, quantum in Martiali populo fatis. Qui autem altioribus scientijs animum imbueret

*Eadem  
apud Po-  
lonos.*

*Qui bonas  
artes domi  
discunt.*

buere cupiunt, adeunt celeberrimam illam vniuersitatem Cracouiensem, aut Zamoscianam Academiam, aut Gymnasium Pofnaniense.

*Et foris.*

*Sed foris  
cum dam-  
no potius  
quàm fru-  
ctu.*

*Epist. 1.  
Promul-  
gidis.*

Cæterum, quia externa nescio quo fūco se adornant, & plerunque optimis patriæ rebus beatiora videntur: idcirco plura scire cupientes, in Belgium, Gallias, Italiam, atque vltimam Hesperiam excurrūt. Quod quidem non improbo: ast quia in iuuenili valdè ætate, hoc certè damno. namque vt eruditionis delictum Ericius Puteanus, inquit, *Sine fructu peregrinatio suscipitur, ante prudentiæ annos.* Et reuera sine fructu, quia lubrica ætas non permittit ea discere, quibus vsuri sint, cū ad virilem peruenerint ætatem, sed potius ea quæ didiscere postea vix multis annis possunt. Omitto, quòd hinc Penatium amor in eis pereat, longa peregrinatione præsertim, pereunt, & amicitia, & vsus ipse, ac modus agendi ver-



di vernaculus . Suscipitur attamen frequentius talis peregrinatio à nostratibus , & cum nescio quo alio vi-  
tiatur , tum condecoratur peritia linguarum , ad quas exactè perno-  
scendas , natura solent nostri apti esse .

*Recompē-  
sant tamē  
linguarum  
peritia.*

Vbi verò adoleuerit , ad iuris patrij peritiam (quod à communi iure distin-  
ctum) animum applicant, si bello pa-  
rum sese aptos viderint; alij ad Aulam Regis, & eius seruitia, vel ad aulas Se-  
natorum, quæ etiam solent frequentis-  
simæ esse, æmulantibus etiam priuatis nobilibus, magnum famulatum, & splendidos aulicos habere . Alij re-  
cta in campos, & in bella eunt, quod communius est, & ibi hastam vi-  
brare, equum cursu fatigare, sa-  
gittas ad scopum, vel ipsum sclo-  
pum ex destinato dirigere, frigus,  
æstus, famem, & cœli iniurias,  
maiorum suorum more assuescunt,  
quibus

*Adulti iu-  
re sese oc-  
cupant.*

*Aula.*

*Et militia.*

Epist. vltima Apo-  
phoreto-  
rum.

quibus postea gloriam sibi parant, & ex recordatione iucundam in senectute oblectationem habent. *Peruenisse enim, per impedita, & scandisse per ardua iucundum postea erit*, dixit pulcherrimè Vir clarissimus, & omnis eruditionis exemplum ERICIVS PVTEANVS.

## C A P V T V.

### *De peregrinationibus, & militia extra Patriam.*

**Q**Vandoquidem nemo canam prudentiam assequi valet, nisi etiā doctrinæ, quam ex lectione hausit, multarum rerum vsum, & peritiam adiunxerit: eamque ipsam, non domestica tantum disciplina comparatam, sed etiam vicinorum atq; remotiorum populorum notitia. Eapropter quoque Equites Poloni, non cōtenti Europæas regiones vidisse, vbi ob pulcherrimam

morum

Poloni ob  
acquiren-  
dam mili-  
tarem peri-  
tiam, etiā  
barbarorū  
provincias  
peragrāt.

norum ciuilitatem, nullum periculum peregrinātibus est, verum etiam Asia-  
ticorum atque Africanorum populo-  
rum, dissitas regiones, nonnulli pene-  
trant: & prodesse patriæ volentes, per-  
noscent, summo cum periculo vitæ,  
intimas Barbarorum illorum prouin-  
cias, cum quibus nobis, ob vicinitatē,  
continuae dissensiones. Et tales ex Dy-  
nastis nostris, ac præcipua nobilitate,  
vt hic minores omittam fuere, Ioānes  
Tarnouius Comes, Romanus Sangu-  
scus, Theodorus Ilinicius, Io. Lancko-  
ronius, Io. Zaréba, Nicolaus Dux Ra-  
diuillus, Io. Tuorouius, & qui heus in  
reditu Fato infelici, & patria insaluta-  
ta occubuit, Erasmus Kretkouius. cui  
ob raras animi dotes, Nobilis quidam  
Patauinus, in D. Antonij delubro, eius-  
modi Cenotaphium posuit.

*Hic te Kretkoui mors, & tua fata ma-  
nebant,*

*(circum*

*Cum terras omnes, & cū maria omnia*

*Lustrā-*

*Obijt æta-  
tis anno  
50. Pata-  
uij, die 15.  
Maij anno  
D. 1558.*

Lustrares, multo defessus membra  
labore.

Terapidus Ganges, gelidaq; Borysthe-  
nis unda,

Te Tagus & Rhenus, teripa binomi-  
nis Istri,

Te septem gemini nouerunt ostia Nili.

Nunc concessisti magnum visurus O-  
lympum

Æternasque domos, ubi dijs immixtus  
manes,

Et curas & spes hominum lamentaq;  
rides.

Qui omnes non aliam profectò ob  
causam, partes orbis præcipuas lustra-  
bant, quàm vt acquisita ex peregrina-  
tione diuersarum rerum prudentia, tã-  
to commodiùs, virtutem suam cõciui-  
bus declarare, & patriam charissimam  
illustrare potuissent. Nec aliud sanè  
prisca temporibus remediũ erat, emer-  
gendi è latebris vulgi, cum omnes in-  
itio pares esse natura iussisset. Sed si quis  
ingenio

*Idem ani-  
mo fuit  
antiquis  
peregrinã  
di qui &  
nobis.*



ingenio & prudentia, pacauerat incitatae multitudinis violentiam, si quis peregrinatione bonas artes, aut mores acquisiuiſſet, ijsq; illuſtris ipſe, conciuſes ſuos ad virtutem informaſſet, ſi quis exteris gentibus ſuaſiſſet, aut ſocietatem, ſi integrae, aut ſeruitutem, ſi non nihil attritis rebus affligebantur: illi ſtatim merita nobilitatis inſignia, vel ſi nobili loco nati aut ſtirpe, honores publici conſenſus deferebāt. Illum diſciplina militaris, illum machinarum peritia, virtus omnes prouehebat. Inde etiam filijs nobilium honor habitus, primum à paternis clientibus, deinde ab omnibus, qui ineſſe in ijs ſemina paternae claritudinis arbitrabantur. Quemadmodum etiam arbitramur dignos omni veneratione, & memoria, manes illorum, qui Heroicis virtutibus ſuis illuſtrarunt patriam noſtram, toties ductatis militum manipulis contra Huſſitas in Bohemiam,

*Poloni  
vicinos Prin  
cipes bellis  
inuarunt.*

C

contra

contra Turcas in Austriam & Hungariam, contra Tartaros in Perecopum, & Bessarabiam, contra Protestantes in Germaniam: & nostra iam memoria, contra eosdem Ecclesiæ Christi inimicos, vt remotiora omitram, ad Ostrogoniam sub Rudolpho Imperatore sumptibus proprijs, & sub Sigismundo Batthoræo in Transyluaniam, non alia spe, aut mercede, quam vt oppressos à Barbaris, aut Hæreticis Catholicos iuuarent: sicut & nuperrimè iuuarunt, contra rebelles subditos, Ferdinandum II. quem Deus Opt. Max. coronatum omni beatitate, velit facere ad vltimum triumphatorem de hostibus suis. Taceo hic Lascios illos illustres, atque Ladscios strenuos, taceo Tencinios, Melecios, Zborouios, ac infinitos alios, magnæ notæ, magni nominis viros. Qui, vt virtutem suam exteris atque fortitudinem declararent, quæuis ardua pericula subire haud recusarunt,

*Catholicis  
prodesse cupientes.*

*Tum vt  
virtutem  
suam exteris  
probarent.*

cusarunt, militando in Gallijs, Lusitania, Belgio, Italia atque Alemaniam, sub diuersorum Principum auspicijs & signis: vnde reuersi, & apud exteros amplissimis honoribus consecutis domi, claruerunt, & apud posteros immortale sibi nomen compararunt. Enimvero enim virtutis merces gloria est, cuius pulchritudine optimus quisque ducitur. Et quamuis natura quadam fiat, vt ignauissimi homines nihil curent, quæ sit de ipsis futura opinio, probatissimi astutamen viri, & nobili loco nati, nihil facere recusant, quo in futuris seculis, benè de se loquentes homines audiant.

*Atque immortalitatem sibi compararent.*

## C A P V T VI.

*De modo militandi, & propugnandi Patriam.*

**D**ixi proprium Equitis Poloni munus esse, tractationem armorum,

*Poloni ho-  
stes suos  
equitatu  
perrumpunt.*

*Peditatu  
mercena-  
rio utuntur.*

*Equitatu  
duplicem  
habent.*

morum, & propriè in equo: superest dicendum, qua ratione, aut consuetudine id facere soleat, cum quælibet gens, ac natio, aliter atque aliter armis utatur, & suum bellandi modum, alijs meliorem existimet. Ergo ut neminem improbem: dico, nobis hunc patrium morem esse, equitatu hostem frangere quisquis ille sit, aut quocunque modo armatus. Sed in campo aperto, & communissimè, priusquam fines nostros attigerit. cum autem intrauerit, & munitiones occupauerit, aut ipse sibi eas parauerit, peditatu, sed mercenario: nostro verò, qui exiguus & inexercitatus est, vel castra tantum, aut oppida propugnamus, vel fossas fodimus, & vallum excitamus, vel pontes construimus, & vias machinis bellicis ducendis sternimus, vel denique onera & impedimenta castrorum conducenda, & custodienda committimus.

Quantum ad equitatu. is uti iam superius



perius dixi, ex nobilitate est, & armaturæ duplicis. *Grauioris*, scilicet, & *Leuioris*: sed qui iterum inter se variè distinguuntur.

Et grauioris quidem armaturæ, alij hastati sunt, & vulgo dicuntur *Hussari*: alij sclopetis tantum muniti, & dicuntur *Harcabuseri*.

Leuioris quoque armaturæ, alij qui breuibus lanceis vtuntur & lorica, vocanturq; *Cemerissi*. alij verò qui vel sclopetis tantum: vel sagittis tantum: vel utroque simul: loricati, aut ignudi, & vocantur *Cosachi*.

*Hussari* sunt, qui ferreos thoraces tergo induti, caput galea, manus verò loricatis manicis armant. Ad offendendū autem siue feriendū hostem, hastas sex cubitos, & medium longas gerunt: appensis, framea curua ad latus sinistrum, acinace, sub pede dextro ad ephippiū, & antrorsum sclopeto breui, vel duobus. Equos habēt generosissimos, quos

*Hastatum  
sumptuosū  
valde, sed  
nihilominus  
fortē.*

qui ditiores sūt, mille aureis, aut sesqui altero comparare solēt, qui tenuiores, sexcētis aut septingentis, nullus vilius ducentis. Cohortes vellis fericeis, quæ ab hastis pendent, distinguunt, colorē sapè eundem, cuius & ipsum vexillum est, habentes. Et prout se quisque, ac equum suum melius, auro, serico, gemmisue exornare potest, sic in publicum procedunt, (non tamen in certamen, quia tum vilioris materiæ omnia utensilia habēt) & corpus sanè ipsum, super thoracem, pellibus tygridum, vrsorū, leopardorum, pantherarum, aut aliarū quarumvis, vel ferocissimarum, vel præciosissimarum bestiarum tegunt: caput verò ita suum, quemadmodum & equi monilibus, & pennis diuersarum auiū, tergo etiā alis artificiosè adlaboratis; cum ipsa frena, pectoralia equorum, & strepas communissimè ab auro aut argento solido gestare soleāt. Et hi tales, præcipuū robur militiæ nostræ cēsentur esse,

esse, & sunt verè, in iustis cōgressibus;

*Harcabuseri* autem, per omnia similes illis, solis hastis exceptis, quarum vice, tria sclopeta habent, hoc est, breuia duo, & tertium oblongum.

Iam autem leuioris equitatus primi dicuntur esse *Cemerissi* lorice, & clypeo ipsi muniti; in hostem, aut sclopos longissimos in manibus gestant: aut arcū & sagittas, accincti gladijs incuruatis, & lancea quatuor cubitorum ad lumbum dextrum subligata, qua congressi cum hoste, atrocissimè cominūs feriūt.

*Leuiorem, sed minus valentem, vtilem tamen quia celeritate vincit.*

*Cosachi* verò, qui itidem duplices inter se, alij lorica, & galea armati, duas bombardas breues, & tertiam longam, curuumq; acinacem habent. Alij ignudi panè, & solis tantum vestibus tecti, arma offensiuā, paria supradictis, ferūt. Vtrique tamen bōbardarū loco, sagittis interdū, & arcu vtuntur. Sicq; persæpè accidit, vt vnus aliquis *Podoliae Megistanes*, quinque aut sex, Equitū

Cofachorum, Regi, aut Reip. cohortes offerat, omnes autem inter se vestitu, & ratione armorum differentes; hoc est, aliam Cemerissorum cū pixidibus, aliam cum arcubus: aliam Cofachorū, loricatam cum bombardis, aliam ignudam cum bombardis quoque; & aliam loricatam cum pharetris, aut demum ignudam cum sagittis. Omnes autem celerrimis equis vtentibus, sed qui minori pretio veniūt, quā Hussarorū, aut Harcabuserorum, vt puta quinquaginta, aut sexaginta aureis tātum: minusq; omnes ab argento aut serico splendēt.

In genere autem. omnes equites Polonici, turmas suas centum equorum, aut ducentorum, aut amplius, pro libitu suorum ductorum faciunt: nullus tamen excedit quadringenta: prout nec minus centum, habere solet. Similiter omnes in vniuersum, currus complures cōmeatu oneratos, infinitosq; calones ac lixas secū trahunt: tum equos quoque,

*Omnis  
equitatus  
currus &  
lixas secū  
trahit.*

*Et equos  
extraordi-  
narios plu-  
rimos.*



que, quibus vel isti excurrēdo à castris prouident dominis suis necessaria, vel in casum belli tantum seruando, vtuntur & ad pōpam & ad prælium. Quod communissimè ipsi cohortium præfecti, aut vices eorum gerētes ex consuetudine facere obligati: Vt si videlicet in pugna ex cōmilitonibus suis alicui equus occisus fuerit, subueniatur ei extēplo, ne cōtritius vngulis equorum intereat: præcipuè velitationis tempore, ne equo excussus viuus in manus hostium deueniat.

Conscribendi autem exercitus hic modus obseruatur. Nobilis, verbi gratia, vel stipendijs Reip. vel ære suo, volens cētum hastatos (idem ferè intelligēdū, & de omni reliquo equitatu) sub vexillo, aut signis suis habere: duos aut tres alios nobiles bello peritos & veteranos adit, eisq; animū suū aperit, atq; simul rogat, velintne signa sua seq. & quos norūt iuuenes aut veteranos secū in com-

*Modus cō  
scribendi  
militis.*

commilitium ducere. Tum illi statim, quantum præter stipendia ordinaria, vel viritim, vel solis nobilibus tantum voluerit donare, ab eo exquirunt; & cognito, quantum aut liberalis, aut tenax sit, faciunt quod rogati erant. Namque ordinarium stipendium est. Decem Polonicales floreni Equiti in mensem, hoc est, aurei duo, & medium tertij. qui igitur nobilis, quatuor equos ad pugnam expeditos, cum suis fessoribus armatis offeret, decem aureos in mensem stipendij habebit, sed quo nullatenus premiari poterit, qui tantum in equos ipsos, arma & requisita alia ad ornatum expendit. Iam autem quo plures quis veteranos, aut splendidiùs adornatos habet, eo inter reliquos Cõductores maioris existimationis, & opinionis esse putatur. Ergo vel æqualiter omnibus commilitonibus suis summam pecuniæ certam donat, vel sigillatim cuilibet nobili, res diuersas

*Stipedium  
eius ordi-  
narium.*

*Extra or-  
dinaria à  
Conducto-  
ribus mu-  
nera.*

uerſas ad armaturam aut veſtitum ſpectantes; hoc eſt, equum vni bello aptum, frameam vel acinacem alij argento exornatum, vel quidpiam ſimile. Explebunt verò centenarium illum ſaltem triginta nobiles, quorū alius duos, alius tres, aut quatuor equos præſentabit: quo igitur plures equos, & plus circa ſe ornatus habebit, ſolidiora etiā munera à ſuo Ductore accipiet. qui idem, ſtatim illis comitatum ſufficientem providere debebit, vbi die dicta ad ſe conuenerint, & tamdiu providebit, quamdiū fines regni non exceſſerint. Iam autem in ſolo hoſtili, vel etiā patriæ, caſtris conſtitutis, quiſque ex eo viuet, quod in itinere ſibi comparauit, & curru ſecum apportauit. Vnus autem ex illis nobilibus, qui, exempli cauſa, tres equos armatos ad pugnam habet, ducet etiam & quartum reſeruatum, vti dixi, in caſum, ſi fortè ex illis tribus vnus ei occiſus fuerit, vt alium

*Equorum  
et lixarum  
ingens numerus.*

aliud extemplò habere possit, nec pateretur quantum in se est, manipulum suum diminui. Similiter & seruum vnum, qui alij equo insidens minori, illum generosorem ductabit, paratus & ipse in similem euentum, si necessitas occurrat. Habebit quoque sex alios equos qui currum ipsum trahent, & duos ad minus, quibus supra dicti calones insidebunt, in omnem excursum parati, sed maximè, vt prouideant pabula, commeatum & rapinam ex agro hostili. Atque sic unus nobilis, qui met tertius stipendia meretur, habebit equos tredecim, homines ad minus decem. Tota verò centum equorum cohors, septingentos circiter equos, personas quingentas. minùs tamen, cum cohors erit leuis armaturæ, puta Cosachorum.

Vbi igitur dicuntur esse decem millia equitatus Polonici, vtriusque armaturæ, ibi censenda sunt, ad minimum



nimum triginta millia hominum esse: alterum tantum equorum. Dumque ipsi milites in aciem, ut manus conferant cum hoste, procedunt, calones qui in castris manent, pars facta ex curribus munitione impedimenta defendere tenentur, pars verò per turmas dispositi, à tergo dominorum suorum, nouum agmen ostentant, & hosti terrorem incutiunt. Interdum incurfant circumuentum, perturbantque inopinantem ac profligatum seu cæsum spoliant; (quisque domino suo maiorem prædam procurando) nam victoribus ipsis ex equo descendere pudor est: & interpugnandum, porrigere manum ad prædam, capitis crimen. Præda verò ipsa non cedit in commune, ut solet fieri vrbe aliqua expugnata, sed prout quisque lixa capere potest, ita domino suo adfert: qui potiora sibi eligit, reliqua autem seruis suis diuidenda

*Officium  
lixarum  
seu calonũ.*

*Præda ex  
hoste militi.*

uidenda tradit ; rem verò notabilem ;  
 & sicut signa hostilia , aut captiuos  
 principaliores , Generali præsentat .  
 Qui & ipse nullum immuneratum à se  
 dimittit , & res illas Regi in Senatus  
 confessu frequentiori offerendo , serio  
 recommendat vnumquemque ex viris  
 fortibus : quos deinde ille possessioni-  
 bus, aut Præfecturis donat, honoribus-  
 que diuersis, pro meritis exornat .

Quantum ad peditatum, is paucissi-  
 mus habetur in Polonia ex Polonis, &  
 si qui sunt, ex plebe omnes. bello autē  
 ingruente ex Germania, vel Hungaria  
 adducuntur, quorum isti, vestibus at-  
 que armis acceptis, sæpissimè vel ad  
 hostem transfugiunt, vel in patriam  
 suam, vicinitate ipsa occasionem præ-  
 bente: illi, aërem nostrum, & belli in-  
 commoda sine tecto ferre impotentes,  
 moriuntur passim aut inficiuntur mor-  
 bis. Nostrates verò, quia nullibi extra  
 patriam pedem extulerunt, aut bella  
 vide-

*Et merita  
 ex virtute*

*Peditibus  
 Poloni v-  
 tuntur, vel  
 ex Germa-  
 nia, vel ex  
 Hungaria  
 conductis,  
 vel ex a-  
 gris suis di-  
 lectis.*

viderunt, parum exercitati sunt: benè tamen ad labores, & celi iniurias obdurati, obque simplicitatem ipsam fideles. Meliores tamen omni mercenario, cum ex Russiæ partibus collecti, & exercitati aliquot bellis erunt, quia & patriæ amantes, & gloriæ cupidi, exiguoque comœatu contenti. Sciendum ergo duplicem peditatû in exercitibus Polonorum repperiri. Alium ex diuersis Regni prouincijs collectû, maximè verò ex montibus Carpatijs, Poloniam ab Hungaria diuidentibus, & hi vocantur vulgo *Haiduci*. Alium autem ex solius Podoliæ territorijs, adiacentibusq; districtibus, qui communi Vkrainæ nomine appellantur, coaceruatum, & vocantur isti *Cosàchi Zaporosenses*. de quibus ne confusio fiat, sigillatim.

*Et qui ex agris suis, sunt duplices.*

## CAPVT VII.

## De Haiducis.

*Arma il-  
lorum, &  
vestitus.*

*Ductores  
sen præse-  
cti.*

**O**Mnis peditatus, qui uel ex Polo-  
niæ diuersis prouincijs collectus  
est, uel ex Hungaria deductus, cōmuni  
Haiducorum nomine appellatur, ar-  
maturq; ex publico framea incuruata,  
securi breui, & sclopeto oblongo, pul-  
uerem etiam quantum satis toto bello  
ex publico accipiens, sicut, & vestitum  
cum toga sua integrum, quaelibet tur-  
ma vnius coloris. Duces sequuntur  
Nobiles Polonos, qui & proteruiam  
illorum frangere scirent sua industria,  
& autoritate incitarent ad præclare  
agendum in bellis, atque exemplo. So-  
lent autem trecenti & quadringenti  
vnum signum sequi: non tamen pau-  
ciores centum, tibicinibus sonantibus  
& tympano: quibus similiter ut & equi-  
tibus

tibus à colonis, aut oppidanis prouinciarum victus præbetur, adeò sufficiens vt possint etiam sibi in futurum prouidere, & currus, quos paucos habere solent, commeatu implere; qui postquam non suffecerit in castris, stipendijs suis viuere debent, & præda ex hoste. Non item inclusi munitionibus, quia sequi aureum tantum in mensem accipiunt stipendij; nec etiam illis per hostem liceret exire arce, aut sufficeret exiguus aliquis victus toti cohorti raptu quæsitus. Prouisi igitur à Repub. & sic, vti dixi, vestiti atque armati, nulum laborem, in oppugnandis aut propugnandis fortificijs, in construendis pontibus, metandis castris, fossibus fondendis, aut conducendis bellicis tormentis, atque demùm excubijs pro vallo faciendis, recusare possunt, aut debent, velut & pugnam aperto Marte detractandi, sub capitis poena. Sed qui nihilominus in grauib. periculis,

D etiam

*Commeatus à Villanis.*

*Officium in bellis & labore.*



etiam à grauioris armaturæ equitibus adiuari solent, qui equis dimissis, vltro in partem laboris veniunt, animosiores illos faciendo exemplo suo, & voce, proponēdoq; præmia & spem honoris, transeundi videlicet in ordinem equestrem, si quid conditione sua maius attentatum aliqui assecuti fuerint: more Spartanorum, aut veterum Romanorum, quibus celebre fuit, illos qui Reip. vel amplificandæ, vel ornandæ causa, præclarum quidpiam gessissent, vel pietatem iustitiæ iunctam, multiplici ac vario argumētorum genere, exercuissent, in patriciorum ordine transcribere, atque encomijs, panegyricis, elogijs attollere, statuas ex Pario lapide, quin & ex argento, & auro effictas, pyramides præaltas, obeliscos, arcus triūphales eis erigere, perpetuariq; nomina illorum consecrare, & in concilium denique Deorum referre. In nostra vero patria, quia nihil or-

Totum  
-um  
animo ob  
ad de  
ad de

*Antiquus  
Romano-  
rum mos  
benemer-  
itos de Rep.  
Elogijs &  
honoribus  
ornare.*

In ordine Equeſtri altius habetur, ex  
quibus & Ciuiles, & Eccleſiaſtici ma-  
giſtratus ſiunt, ideo emergentibus è  
plebe, non aliud primum, quàm bal-  
theus equeſtris à Rege, poſſeſſiones de  
inde ac præfecturæ Vrbiũ concedun-  
tur: vt ſic Repub. aſſentiente, & quaſi  
per ianuam virtutis, ingreſſo in tem-  
plum Honoris, honor ab omnibus ha-  
beretur: & cingulum militare, etiam  
poſteri ſui geſtarent. Quod intelligen-  
dum etiam & de viris litteratis, quos  
probitatis nota, à reliquo vulgo diſcri-  
minauit: nam Conuentu publico diſ-  
ſentiente, nullus inſcribi poteſt, in al-  
bum nobilitatis.

*Polonoriũ  
conſuetu-  
do beneme-  
ritos de pa-  
tria hono-  
ribus ex-  
tollere.*

*capitulum  
Romano  
2011 m. 11  
Genem  
2011 m. 11  
2011 m. 11  
2011 m. 11*

**CAPVT VLTIMVM.**

*De Coſachis Zaporofenſibus.*

**Q**uoniam multi multa de Coſachis  
fabulati ſunt, vel Byzantio,

vel ex Alemania, de illorum excu-  
 sionibus in Turcarum regiones, lit-  
 teris acceptis, per ordinarios tabella-  
 rios, qui noua quotidie spargūt, & nus-  
 quam certa adferunt, nescientes quod  
 alij Cosachi sint, qui in Germania fue-  
 rūt, alij qui Turcam eiusq̃, populos in-  
 festant: idcirco speciali hic modo Za-  
 porosēses, qui Mari Euxino vicini ma-  
 nent, & cum Barbaris gentibus, bella  
 quotidiana gerunt, describere intēdi-  
 mus, cum de illis Cosachis equitibus,  
 quales Germanico Cēsari suppetiābā-  
 tur satis abundē capite paulo superio-  
 ri dictum sit; maxime quod plurimi re-  
 periantur rerum nostrarū imperiti, qui  
 putent Cosachorum gentem, à Regni  
 Poloniē populis esse diuersam, lingua  
 & origine.

Itaque sciendum Cosachos dupli-  
 ces esse. equites Polonos leuiter arma-  
 tos alios; de quibus iam diximus: &  
 alios pedites, ex Russiæ prouincijs, hoc  
 est,

*Alij Co-  
 sachi sunt,  
 qui in Ger-  
 mania fue-  
 runt, &  
 alij qui  
 Turcas in-  
 cursant.*

est, Chiouienſi, & Braclauienſi, Pala-  
tinatibus ruſticos collectos, & colluuię  
plebiſ; diciq; *Zaporofenſes* quaſi vltra-  
limitaneos. poroh enim in Roxolano  
limen ſignificat. Vbi ergo Boryſthe-  
nes, Ruſſiæ totius principalis fluuius,  
receptis amnibus innumeris auctus, ex-  
cedit limina ſeu fines Terrę Chiouien-  
ſis, quę vltima eſt verſus Oriętem, Re-  
gni Polonię prouincia, ibi in alueum  
vnum ſe ſe recipiens, quo longius per  
decliua fertur, eo maiori cum impetu  
ad ima decurrit; & mole ſua decidens  
inferius, gradus quorſdam efficere vide-  
tur: donec ad infiniam planiciem de-  
latus, in ramos ſeſe complures diuidit,  
& inſularum quas efficit oppoſitu cur-  
ſum ſuum retundit, ac lenius poſtea in  
mare Euxinum deferitur. Gradus itaq;  
illi quos fluuius ille decidens frequen-  
tius efficit, porohi vulgo dicuntur, ſeu  
limina: & Coſachi ipſi, in inſulis fluuij  
vltra limina illa habitantes. *Zaporofen-*

*Vnde dicti  
Zaporofen-  
ſes Coſa-  
chi.*



# 54 *Simonis Staronofci*

chorum

377

*Tres Cosa-  
chorum in  
sule in qui-  
bus habi-  
tant.*

cap. 23  
Anthon

*ses, & Cosachi, quasi omnia spernentes, etiam ipsam mortem. Inter insulas autem Borysthenis, tres censentur esse præcipue, in quibus Cosachi resident piscatu, venatione, aucupio, & rei militaris exercitio, vitam traducentes. prima insula ab eis vocatur Tomacouca, à Thoma, duce quodam illorum denominata. Secunda Kochan, quasi delictum velis dicere, quod multum Cosachis placuerit in ea habitare. Et tertia Visniouecky, quia ex Satrapis Russiæ, Visnioueckius quidam, bellum olim cum Tartaris, suis auspicijs gerens, eo sese cum suis velut in artem munitissimam recipere solebat.*

*Qui sint  
Zaporosen-  
ses.*

*Sunt ergo Cosachi Zaporosen-  
ses, rustici, ex pagis aut oppidis diuerso-  
rum Equitum Poloniæ, sed præcipue  
Regis ipsius, atque Episcopi Chio-  
uiensis, ultro, & sine stipendio villo  
collecti, sola militaris gloriæ fama il-  
los conuocante: Græciani ritus om-  
nes, &*



nes, & omnis litteraturæ pænè ignari.  
Cœperunt autem originem suam, re-  
gnante in Polonia Sigismundo I. qui  
cum Tartaris, Moschouitis atque  
Daciæ incolis bella grauissima gessit:  
quibus exercitatus à puero Ostaphæus  
quidam Daskieuičius; ex oppido Ou-  
rucko, subditus Constantini Ducis  
Ostrogij, Generalis exercituum Ma-  
gni Ducatus Lithuaniae, viri bellico-  
sissimi, postquam ad maturiorem æta-  
tem deuenit, cœpit statim animos  
commillitonum prænsare, & ut signa  
sua sequantur, rogare, ac suadere, quod  
& persuasit: factaq; nonnulla manu,  
duxit in hostem proprijs auspicijs, se-  
mel atque iterum, & conglobatos tan-  
dem, indigetauit nomine Cosachor-  
um, quasi contemnentium cuncta,  
præter famam bonam: atque sic ex  
paruis initijs, sectam militarem fecit:  
& reuera magnam. Nam statim in pri-  
mordijs illis, & Moscho, & Tartaris

*Quando  
cæperunt  
esse.*

*1597*

*1598*

*1599*

*Et quo  
Authore.*

*1599*

*1599*

*1599*

valdè grauis fuit, multisque cladibus  
 Barbaros ille ipse affecit, Baltheo  
 Equestri pro meritis à Rege donatus,  
 & multis Præfecturis ornatus. Tandem  
 vita functo, Centuriones nouum sibi  
 caput elegerunt, cum vndique ad se  
 præcipua quæque iuuentus conflue-  
 ret diuite præda alliciente: obtinue-  
 runtq; vsu, & temporis successu, vt in  
 hostem quando sibi placeret irent,  
 etiam Rege inscio, & Repub. donec  
 in Comitijs Regni moderatum fuit.

*Aggrega-  
 ti successi-  
 ue et multi-  
 plicati etiã  
 externos  
 Principes  
 bello inua-  
 runt.*

Præstiterunt nihilominus sæpiùs  
 fidelem patriæ operam, vicinis quo-  
 que Principibus missis suppetijs, con-  
 tra hostes fidei, videlicet Iuoniæ, &  
 Bogdano, Moldauia: Aaroni, & Mi-  
 chaeli, Valachia, Dynastis: Christo-  
 phero, & Sigismundo Bathoreis, Trã-  
 sylvania Principibus: Rudolpho, &  
 Matthiæ Romanis Imperatoribus, Hũ-  
 garia florentissimum regnum ab Ot-  
 thomanica crudelitate vindicantibus.

vt hic

hic omittam Lascios, Visniouecios, Striflos, Potocios, Iaslouecios, Pretificios, Buczacios, Korecios aliosq; Podolia megistanes, & Heroes fortissimos quos illi toties secuti, Turcarum exercitus atrocissimis cladibus affecerunt: feceruntq; illustre nomen Polonum, obtentis de Barbaris felicissimis victorijs, proprijs eorum Polemarchis p̄seuntibus, quales fuere Suierfcouius ille animosus, Holubcus, Koska, Serbrny, Loboda, Sahaidaczny, & qui nunc illis præest, vir multa belli peritia clarus Doroffenko. Sed quia nihil tam sanctum esse potest, quod nō corrumpat diuturnitas temporis: multaq; probè à maioribus instituta, vno senectutis vitio defluxisse in turpissimos ritus videmus. Ita & illorum institutum, bono fine, ad propulsandos Barbarorum incursus, statutum, corruptis successiue moribus & disciplina, protulit nonnullos, qui contra fas nefasq; ausi,

*Nobiles  
Polonos se  
cuti Tur-  
cam infe-  
starunt.*

*Cum suis  
Ducibus  
progressi  
barbaros  
cladibus  
affecerunt.*

*Sed vetu-  
state tem-  
poris om-  
nia corru-  
puntur &  
indetermi-  
nant.*

*Cosaehi pu-  
nit i sepius  
à Regibus  
Poloniae.*

non vicinos modò populos, pace inno-  
biscum colentes, armis lacescere, verù  
etiam patriam ipsam hostili planè mo-  
do depopulari, & in dominos suos ru-  
stici saevire. Quare audentem Dacos  
contra pacta Reipub. incursionibus in-  
festare, Rex Stephanus, Diuæ memoriæ  
Ducem eorum Podkouam, Leopoldica-  
pitis supplicio puniuit. Serenissimus  
verò Rex modernus, Naliuaicum pri-  
mò Generalem illorum Varsoviæ Se-  
natus decreto condemnauit. Deinde  
bello Moscouitico peracto, per Gene-  
ralem magni Duc. Lit. Carolum Chod-  
kieuicium, grassantes per regni pro-  
uincias, & nescio quid hostile molien-  
tes, clade notabili affecit, atque sic Pin-  
scensem districtum, ac Modzyrensem,  
ab exactiõibus ingentibus liberauit.  
Quos iterù Chodkieuicius idem, tem-  
pore belli Turcici ad Chotimiam com-  
pescuit, decapitatis ex eis octuaginta  
præcipuis & Duce illorum Borodauka.

Deni-



Denique ante triennium, Stanislaus Koniecpolski, Regni Poloniae Generalis, rebelles bello vltus est, occisis ex eis octo millibus in acie: reliquos (nam quadraginta millia fuerunt) adstrictos sacramento, veterem disciplinam seruare coegit.

Fiunt autem Cosachi Zaporosenses tali modo: primo vere, cum niues liquefacti campos aperire incipiunt, quisque militari gloria concitatus, comparata nauicula & commeatu, nauigat secundo Borysthene, ad illas superius explicatas insulas Cosachorum, vbi dux illorum, seu Generalis, dilectum facit ex eis, qui veniunt, & quem aptum censeat, referri in cathalogum à Secretario iubet: ineptum, recepto ab eo, quem secum tulit, commeatu, domum remittit. Conscriptos, verò, tradit disciplinae decurionum, quibus obedientiam perpetuò tenentur, donec vel statum, vel conditionem non permutauerint.

*Quando  
Cosachi  
exercitum  
suum col-  
ligunt.*



Generalis ipse, de medio illorum deligitur: & durat, quantum, & fortuna cum illo: Si tamen prudens, & gnarus rerū erit, comprobatur à Chiliarchis, sicut & isti à Centurionibus, aut Centurio à Decurionibus, vsque ad terminum vitæ: ad quem actum, sicut & ad reliqua consilia, non pertinent tyrones, vsque ad triennium suspensi: quo tempore seruorū loco sunt, & puniuntur grauissimè à suis decurionibus, si quid delinquerint. Qui vnus præter nouem commilitones veteranos, habebit triginta, & interdū quinquaginta tyrones, quibus imperat herili modo, maximè cum ad prælium descenditur: nam tum, si qui fortè ex eis diffuissent, comparere amplius non poterunt, nam fuissent capite puniti, nisi fortè domi, cum iam redeunt omnes in hyberna, idque cum facti deprecatione. Per brumam verò Generalis domum rediens, relinquit in qualibet insula

*Quomodo  
tyrones  
puniunt.*

*Quomodo  
Zaporohos  
custodiunt.*

insula; quingentos, ad custodiam locorum, tormentorum, aliarumve machinarum bellicarum: vbi sub megilibus ex arundine factis, corticibusq; arborum contectis, expectant reditum illius, & commilitonum, existimanturq; esse clariores reliquis postquam aliquot annis, frigus & algorem ibi, atque famem, pro communi bono in excubijs manendo, supportauerint.

Arma omnes habent, sclopetū oblongum, & gladium incuruum: alij breuem lanceam, & sagittas, sed rarer; thoracem ferreum, aut loricā, nullus, nec generalis ipse; sicut nec vestem splendidam, aut lautiorem mensam. Sed rudi gausape, & penula recti, piscibus sole siccatis, & ferina vitam sustentant, fruituri mele, & sero lactis ad vxores reuersi; namque in castris illorum femina nulla esse potest, nisi fortè cum præda alia capta.

Bellandi modum duplicem habent.

Mari

*Quibus ar-*  
*mas videntur*  
*etiam videntur*  
*etiam videntur*

*Quomodo  
bella ge-  
rant in ma-  
ri.*

Mari, & Terra. Mare non omnes conscendunt, sed qui audaces tantum, & apti sufferre fætorem illius. nauiculis vtuntur, quæ triginta homines aut amplius paulò capiunt, nec submergi à fluctibus possunt, certæ herbæ fasciculis per circulum nauis adnexis. non se tamen pelago committunt, sed dextrum solum littus adnauigant, Bassarabiam atque Thraciæ agros palantes, in quantum pedes, vna nocte recedere à nauibus possunt. Lógius, cum ad sinistrum Tauricam Chersonesum depopulantes nauigant, quia Scithas contra se minus audere sciunt. Quod si in triremes Turcarum inciderint, consultius semper habent occumbere, quam turpiter fugire, aut deditionem facere, atque ideo impares etiam viribus, pugnam non detractant, & frequentiùs verli in desperationem vincunt. Sicq; victoria obtenta, interdum in Asiam, & Trapezuntum vsque, cum triremibus Turcarum

rum & signis, excurrunt, trucidantq;  
aut capiunt quos offendunt incautos.  
Sed hoc antea fieri solebat; nunc Tur-  
ca collocatis in custodiam maris illius,  
omnibus fermè nauibus suis, præpedi-  
uit multum conatus illorum, qui fre-  
quentiùs iam proxima Constantino-  
poli prædia, igni succendere, aut de-  
prædari solebant. Nec lucrari modo  
quidquam possunt, amplius nisi astu  
militari, seu stratagemate aliquo.

Cum autem in campos Nohayscē-  
sium Tartarorum, aut Præcopensium  
excurrunt, pedes omnes eunt; & si gre-  
ges equorum nanciscuntur, ex templo  
se equites faciunt, & vel incursant ho-  
stem perturbatum, vel redeunt ad ter-  
ram suam, & munitiones Borystenis, si  
ingruentem vident. Quod si armenta  
tantum, & oves repperierint, ligatos  
caudis, & cornubus pro munitione sta-  
tuunt, si hostis ferox in abeuntes, & sic  
velut vallo muniti propugnant.

*Quomodo  
in Terra  
Tartaro-  
rum.*



Quonodo  
in provin-  
cijs planis  
ubi currus  
habere pos-  
sunt.

Cæterum quando in alias provin-  
cias exercitum ducunt, currus uno  
equo tractos singuli habent, & bom-  
bardas seu æneas trahunt, seu tor-  
menta. Quilibet autem præter pulve-  
rem bombardarium, & commeatum  
suum, tenetur habere securim, falcom,  
ligonem, restes & alia necessaria seu  
vallo faciendo, seu curribus ligandis,  
quando cum exercitu toto proceditur,  
pugnando per viam cum hoste. Et tunc  
illi curruum in ordinem dispositionem  
Thabor appellant, Vbi ante, & à tergo  
machinas relinquunt: ipsi autem, luq-  
tera cum sclopetis regunt, & si graue  
periculum imminet, inter currus sese  
recipiunt, propugnatq; tanquam ex  
munitione. Quod si non suffecerit, id  
istud, currus eosdem in instanti re-  
loq; ra implent, & vallum extruunt fir-  
miorem.

Quid Tha-  
bor dica-  
tur.

Et is est modus bella conficiendi;  
Cosachis, qui cum suo Thabor iuncti  
equi-



At equitibus Polonis, magni solēt esse  
momenti, vt ante septennium, in bel-  
lo illo magno cum Turcis, experti su-  
mus. Nec excedunt ipsi numerum  
quindecim millium, sed cum grega-  
rio milite, seu tyronibus, faciunt exer-  
citus quadraginta millium, quos di-  
sciplina veterum Romanorum, ha-  
bent; & silentium in castris, sobrieta-  
tem, obedientiam, reticentiamq; se-  
cretorum diligentissimè omnes obser-  
uant, & vel Spartano more, aut potius  
rigore, delinquentes corrigunt. Rei-  
pub. absque ære & stipendijs, ad so-  
lius Regis mandatum, in bellis serui-  
tia præstant & operam; quos tamen  
bello finito Rex summa aliqua mora-  
bili, donare solet, ac principales,  
possessionibus agrorum aut villarum.  
Tum nobiles ipsi quorum subditi sunt  
manumissione, & muneribus condi-  
gnis. Non omnes tamen simul in bel-  
lum eunt, sed prout illis Regni Gene-  
ralis

*Disciplina  
militari  
veteres re  
presentat.*

*Sine stipen-  
dijs Reip.  
militant.*

ralis supremus mandauerit; nam reli-  
qui partim in mare excurrunt, partim  
in campos latissimos Scytharum, par-  
tim in excubijs Podoliæ, & insularum  
suarum manent.

Quod si igitur generalis aliqua ex-  
peditio Reipublicæ fuisset promul-  
gata, habuisset Rex Poloniæ, dilectu  
facto ex omnibus prouincijs *Peditum*  
partim Haiducorum partim Cosacho-  
rum octuaginta millia. *Equitum* tum  
grauioris, tum leuioris armaturæ cir-  
citer ducenta millia absque vllis stipen-  
dijs, & indictione vectigalium. Sed qui  
non potuissent in vnum locum conue-  
nire, ne nudarentur aliæ partes Regni;  
maior tamen pars potuisset aggregari,  
cæteris ad custodiam prouinciarum  
relictis. Et ob id singulis annis, prima  
post Pascham Dominica, singuli di-  
strictus à suis Palatinis lustrantur, so-  
lentq; omnes parati esse in omnes oc-  
casiones graues. Cæterum bella ordi-

nata

Regis Po-  
loniæ pro  
Regni de-  
fensione  
vl. ma po-  
rem. a.

naria milite stipendiario peraguntur, quibus Respub. ipsa tributis indictis persoluit, Rege nihil de suis prouentibus spendente. Quibus adduntur cohortes vltro in bella & sine stipendijs euntium: tum cohortes ditiorum, qui aut filios, aut nepotes suos ob patriæ amorem, proprijs sumptibus in castra mittunt. Reperiunturq; complures, qui mille, & amplius, milites suo ære ducunt, quotiescunque Patriæ necessitas postulauerit. Nusquã tamẽ talis exercitus solet esse maior millibus viginti, quia eodem tempore simul, oportet alium exercitum, alibi, & interdum quatuor in locis habere. Vnde meis temporibus, maiorem exercitum contra hostes Patriæ, non vidi, quam fuit ille contra Turcas ad Chotimiam, vbi cum mercenario, triginta Polonorum, & quadraginta Cosachorum Zaporosensium millia fuere.

Et hæcenus, de excellentiã Equitis  
Poloni,

*Ordinarij  
exercitus  
Polonici.*

*Ordinarij  
exercitus  
Polonici.*

Poloni, eiusque more militandi. Nunc  
ad te, ò æternum Numen, æterna po-  
tentia Patris, breues, sed calidas pre-  
ces conuerto. *Cōtere brachio tuo forti for-  
titudinem inimicorum nostrorum, & di-  
sperge illos in virtute tua, ut cognoscant  
quia non est alius, qui pugnet pro nobis nisi  
tu DEVS noster. Quoniam Rex noster  
sperat in te Domine, inueniatur manus  
tua omnibus inimicis tuis & dextera tua  
protegat eum.*

F I N I S.

VENETIIS, M. DC. XXVIII.

---

Apud Franciscum Baba.

*[The page contains faint, illegible text, likely bleed-through from the reverse side.]*

141

WINE & SPIRITS.

transmission bands



7576

